



Es war einmal.....

(D'Scoutsjoer 1997/1998 am Réckbléck>)

- Den 19 an 20ten September 1997 huet de Kongress an de Cheffdag zu Miersch déi nei Scoutssaison agelaut.
- D'WIWEL hun am séiersten de Summer oofgeschloss an de 27.09.97 hir éischt Versammlung oofgehaal.
- Dëschdegs den 30.09.97 hun d'PIO'en an D'AVEX mat de Versammlungen ugefaang.
- De 5.10.97 hu mir eis mat enger klenger Delegatioun un der Rousekranzprozessioun vun Elveng op Eimereng bedeelegt,
- Am Verlaaf vum Hierscht sinn 14 nei Leit bei d'Explorer beikomm (André, Nathalia ; Dennis ;Tom ; Boris ; Lynn ; Jessica ; Thierry ; Raoul ; Chris ; Egide ; Dany ; Noémi a Remy).
- Den 12.10.97 hu mir eis un der Feierlechkeet zur « journée commémorative » zu Duelem bedeelegt.
- De 14.10.97 hun d'Explorer Vierz gemaacht fir sèch , a fir spéider Gäscht.
- Den 18ten an 19ten Oktober 1997 hu mir eis mat enger klenger Equipe um JOTA gemellt.
- Vum 25. bis 28ten Oktober 1997 war gemeinsamen Montéescamp vun alle Branchen zu Dideleng ënnert dem Thema « Indiana Jones ». Do hun ënnert dem Alain senger Leedung, d'Valerie, d'Véronique, de Gilles, den Tim an de Francois hir Montée bei d'Pio'en gemaacht. Och d'Noémie, d'Jessica, d'Lynn de Boris, de Chris, den Dany, den Egide, de Raoul, de Remy, den Thierry an den Tom hun bei hirer Montée mussen eppes aushaalen, erënnert sief un d'Hottentottenveillée an un de Passage iwert d'Bréckegelänner, den sie an der Daischtert beim Faakelschein vun de Wëllëf zu den Explorer bruecht huet, wou mir frouh sinn sie derbei ze hunn. Beim Songkontest zu Diddeléng hun d'Bulldogs ënnert dem Impuls vum Pitt senge gudden Iddien mat « *hei kommen d'Scouten* » e Liddchen komponéiert, vun deem mir nach am Summer um Discovery profitéiert hunn.
- Freides den 21ten November 1997 hat eis Amicale en Degustatiounsowend vum Beaujolais nouveau 1997 organiséiert. Bei der Geleeegeheet hu mir eisen Elteren a Frënn d'Méiglechkeet gebueden, eis Fotoen , Filmer an Dia'en vun der läschter Saison ze kucken.
- Samsdegs den 29.11.97 ware mir mat Adventskranzbastelen beschäftegt, dobei gouf et fir déi fleisseg Scouten (a Cheffen) eng Niklosbescherung ouni Klees'chen.
- Samsdegs den 13ten Dezember 1997 huet eise Paschtouer d'Wëllëf mat enger Krëschtveillée iwerrascht.
- Méindes den 22.12.97 si mir mat enger Delegatioun vun de Perler Scouten op Ettelbréck gefuer fir d'Liicht vu Betlehem fir eise Grupp ze empfänken.
- Dëschdegs owens den 23.12.97 hun d'AVEX an d'Pio'en sèch mat engem Nuetsmarsch, enger Spagettisfriess an enger heemlécher Krëschtveillée séilëch a moralësch op Krëschtdaag agestëmmt.
- Op helleger Owend ware mir staark beschäftegt, Mëttes hu mir d'Liicht vu Betlehem a selwer gebaake Kichelcher un eng Reih al Leit aus eise Pooren verschenkt, eng Erfahrung déi mëch all Joer nei beréiert a begeeschtert ; duerno hu mir owens zu Duelem nach matgeholf bei der Gestaltung vun der Krëschtmetten (mat Dia'en a Lesungen) , mais eise Versuch d'Flaam vu Betlehem aus der Metten a vill Haiser ze bréngen ass um staarke Wand gescheitert.

- De 17 an 18ten Januar 1998 hunn s'ech eis Wëllëf Rendez-vous um Kuelbecherhaff ginn fir e flotte Weekend. Dobei sinn fir d'éischte Kéier eis Nowues-cheffen (Steve, Michie an Tim) op engem Weekend zum Asatz komm.
- Op Buergsamsdeg den 28.02.98 hun ,an der Fuesvakanz ,d'AVEX am Home ramouert ; et hun eng Reih Explorer hire Start gemaacht, mir hun den Home geraumt a gebotzt (man höre und staune) a mir hu Fakelen fabrizéiert, déi mir owens zu Fëlschdrëff verkaaft hun fir de Faakelzuch bei der JAC hiirt Buurgbrennen unzeféieren.
- Den 7ten an 8te März 1998 war Theater ugesot. 2 Stécker vun de Wëllëf (*Millionären an e Kilo Rëndflesch*) an 2 Stécker vun den Explorer (*De Clown Peppo a seng Mundharmonika an de Schuppi Zoppert a Companie*) hun de Publikum ze begeeschteren gewosst, an hun och eiser Kees gudd gedo'en.
- Denscheds den 10.03.98 hate mir alle Branchen, eise guddes Geeschter vun der Amicale, an eisen daitsche Frënn Rendez-vous ginn fir mat enger Rezeption de 5te Geburtsdag vun eisem Grupp ze feieren. Et gouf vill Guddes ze jicken an ze drénken (Schnittercher vun de Pio'en gemaacht, Champes vum Anni spendéiert, Kuch vum Monique gebaak a vum Steve dekoréiert), en Don un de Projet Senegal vun den LGS, den Explorer hir Fotosausstellung a vill Foto'en a Filmer aus der « Fréihzeit » wéi eis Pio'en nach Kënnercher an eis Cheffen och nach méih schéin , pardon méih jonk a méih zahlreich waren.
- Donnegdes den 26.03.98 hun d'Scouten zu Fëlschdrëff ee Kraizwee an der Faaschtenzeit ofgehalen.
- Den 28.03.98 hu s'ech d'Cheffen an d'Amicale fir hir 't alljährelecht Aarbechtsiessen zesummefonnt.
- Op Gréngendonnegdeg (den 9ten Abrëll) owens sinn de Pitt, de Jérôme, de Gilles, den Tim , d'Vanessa an de Carlo no der Mass opgebrach fir d' »Operatioun Getsemani » Mat engem Marsch duerch d'Nuecht an enger haarder Veillée wollte mir de Jesus a senger läschter Nuecht begleeden. Den aaneren Daag hu mir trotz schlechtem Wieder eng grouss Quantitéit Konstruktionsholz fir eise Grupp geschnidd an op Duelem bruecht.
- De 25.04.98 waar eis traditionell Bedeelegung un der Grousser Botz zu Duelem.
- Den 3te Mee 1998 war de Steve mat enger ganzer Reih vu Scouten aus dem Chalet um Eescherfeld gestart fir um Pélé des jeunes zu Ufank vun der Muttergottesoktav 1998 deelzehuelen.
- Mëttwochs owens den 20te Mee hunn den Tim an de Gilles mat Bravour duerch d'Play-Backshow geféiert (Piep, Piep , Piep, ich hab euch lieb,) an duerno hu mir mat enger grousser Equipe um Terrain geschloof fir d'Material ze bewaachen dat eis Amicale fir d'Kiirmes organiséiert hat.
- Op Christihimmelfahrt den 21te Mee 1998 huet eis Kiirmes mat flotte Spiller, guddem Iessen an engem schmassege Quiz fir déi Grouss och d'Joer nees e schéine Succès kennt.
- Vum 30.05. op den 02.06.98 ware mir nees vill ënnerwee : D'Pio'en zu Munneref op dem Verbandscamp vun der Piosbranche, an d'AVEX waren zu Bëschrud ënnert dem Thema « Robin Hood » zu hirem Paischtcamp ugetrueden.
- De Weekend vum 20+21 Juni 1998 war zu Duelem op d'Viirbereedung vum Discovery ausgeriicht. Hei hun 8 Explorer s'ech mat enger sérieuser Leeschtung den Orientéierungsbadge verdéngt.
- De 27te Juni hu mir mat enger grousser Delegatioun eisem Frënd a Gruppechef de Réck gestaip wéi hien an der Kathedral zum Diakon geweiht gouf.
- Den 30te Juni huet dësen Evenement zu Duelem och nach eng zünfteg weltlech Feier erliewt. De Jang hat eis invitéiert, seng Weih matzeferien, an do konnte mir jo nëtt nee soen. Merci nach eng Kéier dem edle Sponsor.
- Vum 15-25 Juli 1998 waren eis Explorer zu Biekerech beim Discovery-Summecamp derbei. Mat 25 Jonken , 3 Cheffen a 6 giele Kaapen an 2 Glatzkäpp !!! ware mir eng vun deenen gréisste Gruppen (an déi Bescht !, oder nëtt ?) um Terrain. Wéi mir Samsdeg den 25te Juli eis läschten Piqué'en aus dem Buedem gezunn haten, gouf et engem awer e bësche traureg ëm d'Härz. Mais wann een bedenkt, datt mir dun niewt allem waat elo hei rappeléiert gouf, 30 Versammlungen , 4 Grupperéit an 5 Viirbereedungsversammlungen hannert eis haten , dann hate mir eis , eis Summervakanz dach awer verdéngt. Oder nett ?